

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI KHAMIS, 30 NOVEMBER 2023, PUKUL 10.00 PAGI

Bil. 16

WAKTU PERTANYAAN-PERTANYAAN MENTERI

1. PR-1523-MQT2556
Tuan Fong Kui Lun [Bukit Bintang] minta **MENTERI PEMBANGUNAN KERAJAAN TEMPATAN** menyatakan negeri-negeri yang telah mengguna pakai UUKB Seragam (Pindaan) 2021 dan bilakah Undang2 Kecil Bangunan (Wilayah Persekutuan Kuala Lumpur 1985 dikemaskini supaya selaras dengan peruntukan UUKB Seragam (Pindaan) 2021.
2. PR-1523-MQT2560
Dato' Hajah Siti Zailah binti Mohd Yusoff [Rantau Panjang] minta **PERDANA MENTERI** menyatakan :
 - (a) situasi terkini bencana banjir yang sedang melanda negara; dan
 - (b) apakah langkah segera Kerajaan Persekutuan dalam memastikan kebajikan mangsa banjir terjaga di pusat pemindahan sementara (PPS).
3. PR-1523-MQT2555
Tuan Lim Guan Eng [Bagan] minta **MENTERI PELANCONGAN, SENI DAN BUDAYA** menyatakan impak positif pengecualian visa selama 30 hari kepada pelancong China dan India ke atas objektif mencapai sasaran 25 juta pelancong luar negeri dan nyatakan nilai hasilnya, senarai negara yang menikmati pengecualian visa dan mengapakah ia tidak diperluaskan ke negara-negara lain seperti Kesatuan Eropah dan Amerika Syarikat ataupun ahli-ahli APEC.

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI KHAMIS, 30 NOVEMBER 2023, PUKUL 10.00 PAGI

Bil. 80

WAKTU PERTANYAAN-PERTANYAAN MENTERI

PERTANYAAN-PERTANYAAN BAGI JAWAB LISAN

1. PR-1523-L21472
Tuan Pang Hok Liong [Labis] minta **MENTERI DALAM NEGERI** menyatakan pihak polis dan JPJ walaupun boleh membuat sekatan jalan raya (SJR) di mana-mana jalan tetapi sekatan selepas bukit dan selekoh jalan agak membahayakan pengguna jalan raya dan tindakan sekatan perlu dilihat juga dari segi keselamatan pengguna jalan raya. Terangkan prosedur operasi standard (SOP) membuat SJR seperti pilihan lokasi, jarak peletakan papan amaran sekatan, jumlah pegawai kawalan dan sebagainya.
2. PR-1523-L22222
Dr. Radzi Jidin [Putrajaya] minta **MENTERI EKONOMI** menyatakan pendekatan yang akan digunakan Kerajaan bagi memastikan sasaran kadar bahagian pampasan pekerja (CE) daripada KDNK sebanyak 40% pada tahun 2025 akan dapat dicapai.
3. PR-1523-L21060
Tuan Onn bin Abu Bakar [Batu Pahat] minta **MENTERI PERTANIAN DAN KETERJAMINAN MAKANAN** menyatakan adakah Kementerian bercadang untuk memajukan semula ladang kelapa untuk memenuhi keperluan makanan negara dan keperluan industri tempatan.

4. PR-1523-L21743
Dato' Haji Abdul Khalib bin Abdullah [Rompin] minta **MENTERI PENDIDIKAN** menyatakan adakah Kementerian mempunyai perancangan tertentu ke arah pembentukan Dasar Pendidikan Digital bagi mempercepatkan adaptasi pendigitalan dalam ekosistem Pendidikan negara.
5. PR-1523-L21191
Datuk Wetrom bin Bahanda [Kota Marudu] minta **PERDANA MENTERI** menyatakan berapa jumlah peruntukan bagi daerah Kota Marudu yang telah dilaksanakan dan belum dilaksanakan dalam Rancangan Malaysia Ke-12 ini.
6. PR-1523-L22183
Tuan Mohd Syahir bin Che Sulaiman [Bachok] minta **MENTERI EKONOMI** menyatakan pendirian Kerajaan untuk menggalakkan kerjasama pintar dan sinergi rentas-negeri, contohnya kerjasama antara empat (4) buah negeri jelapang makanan iaitu Kedah, Perlis, Kelantan dan Terengganu, dalam aspek perkongsian modal, sumber mineral dan sumber manusia.
7. PR-1523-L(5)00190
Tuan Tan Kar Hing [Gopeng] minta **MENTERI PENDIDIKAN** menyatakan langkah-langkah Kementerian dalam usaha menyelesaikan isu keciciran Orang Asli, terutamanya di kampung pedalaman yang berpunca masalah jarak jauh dan pengangkutan bagi mengelakkan tragedi seperti Pos Tohoi daripada berlaku lagi.

[Pertanyaan di bawah PM 22(5)]

8. PR-1523-L22445
Tuan Haji Bakri bin Jamaluddin [Tangga Batu] minta **MENTERI PERTANIAN DAN KETERJAMINAN MAKANAN** menyatakan sejauh manakah pencapaian (*progress*) projek penanaman '*grain corn*' untuk kegunaan industri penternakan negara terutama ayam daging dan ayam telur bagi mengurangkan beban kos mengimport jagung yang mahal dan mempengaruhi industri ini.
9. PR-1523-L21878
Tuan Azli bin Yusof [Shah Alam] minta **MENTERI EKONOMI** menyatakan adakah Kerajaan berhasrat untuk memperkenalkan sistem e-wallet keseluruhannya bagi menggantikan bantuan tunai dalam pelaksanaan bantuan subsidi bersasar kepada golongan yang benar-benar memerlukan keperluan barangan asas.

10. PR-1523-L22579
Datuk Dr. Nik Muhammad Zawawi bin Haji Salleh [Pasir Puteh] minta **MENTERI PERTANIAN DAN KETERJAMINAN MAKANAN** menyatakan justifikasi pihak Kementerian masih membenarkan pengimportan sayur-sayuran yang telah pun melebihi SSR 100% dan telah menyebabkan lambakan sayur-sayuran tempatan di pasaran sejak awal 2023 hingga sekarang.
11. PR-1523-L22179
Tuan Chong Chieng Jen [Stampin] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan dasar Kerajaan untuk menggalakkan penjana tenaga boleh baharu dan apakah ganjaran kepada negeri Sarawak atas usaha dan sumbangannya dalam bidang itu.
12. PR-1523-L22022
Tuan Zulkifli bin Ismail [Jasin] minta **PERDANA MENTERI** menyatakan apakah hasil daripada program pengukuran penerapan Maqasid Syariah dalam kalangan agensi di Jabatan Perdana Menteri (Hal Ehwal Islam) Kajian Pelaksanaan I-MaqSD yang telah dilaksanakan pada tahun 2021.
13. PR-1523-L21798
Tuan Tan Hong Pin [Bakri] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan pendirian Kementerian dalam Perjanjian Plastik Global, komitmen untuk menangani krisis plastik dan usaha yang telah diambil untuk mengekang pencemaran alam sekitar daripada sisa buangan plastik menjelang 2040. Adakah Kementerian akan menghadkan pengeluaran plastik.
14. PR-1523-L22491
Tuan Hassan bin Saad [Baling] minta **MENTERI PENDIDIKAN** menyatakan sejauh mana Program Transformasi Sekolah 2025 membantu daripada segi memenuhi keperluan sekolah untuk subjek tertentu dan menyelesaikan masalah 'duka lara' guru-guru.
15. PR-1523-L21267
Dato' Sri Richard Riot anak Jaem [Serian] minta **MENTERI DALAM NEGERI** menyatakan apakah status terkini projek pembinaan Kompleks Imigresen, Kastam, Kuarantin dan Keselamatan (ICQS) Tebedu.

16. PR-1523-L22433
Tuan Haji Mohd Hasnizan bin Harun [Hulu Selangor] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan adakah Kementerian mempunyai perancangan untuk menyediakan Sistem Amaran Banjir Kepala Air (SABKA) di lokasi berisiko tinggi di seluruh Malaysia khususnya di Hulu Selangor.
17. PR-1523-L22202
Tuan Yuneswaran A/L Ramaraj [Segamat] minta **MENTERI PERTANIAN DAN KETERJAMINAN MAKANAN** menyatakan resolusi yang telah dicapai menerusi dukungan kerjasama Pertubuhan Makanan dan Pertanian (FAO) Pertubuhan Bangsa-Bangsa Bersatu (PBB) dalam meningkatkan keterjaminan makanan di negara ini rentetan daripada gelombang El-Nino yang berisiko besar terhadap keberhasilan produk tani di peringkat global.
18. PR-1523-L22633
Komander Nordin bin Ahmad Ismail TLDM (Bersara) [Lumut] minta **MENTERI DALAM NEGERI** menyatakan status terkini pembinaan 3 buah kapal peronda luar pesisir (OPV) milik Agensi Penguatkuasaan Maritim Malaysia (APMM).
19. PR-1523-L22413
Tuan Wong Chen [Subang] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan anggaran penjimatan fiskal berikutan pengurangan perbelanjaan apabila Malaysia mencapai sasaran sebanyak 1.5 juta kenderaan elektrik pada tahun 2040.
20. PR-1523-L22297
Tuan Nurul Amin bin Hamid [Padang Terap] minta **MENTERI EKONOMI** menyatakan perancangan terkini dalam usaha menarik para pelabur dalam projek Kedah Rubber City (KRC).
21. PR-1523-L21626
Puan Rodiyah binti Sapiee [Batang Sadong] minta **MENTERI PERTANIAN DAN KETERJAMINAN MAKANAN** menyatakan tindakan Kementerian dalam menangani masalah isu kekurangan bekalan benih padi yang berkualiti bagi meningkatkan hasil padi untuk keperluan negara.

22. PR-1523-L22352

Tuan Ahmad Tarmizi bin Sulaiman [Sik] minta **MENTERI PERTANIAN DAN KETERJAMINAN MAKANAN** menyatakan langkah jangka panjang untuk memastikan keluasan tanah sawah tidak berkurangan bahkan dapat dipertingkatkan bagi memastikan tahap sara diri (SSL) beras negara dalam keadaan terjamin sehingga 100% pada masa hadapan.

23. PR-1523-L21393

Tuan Chow Kon Yeow [Batu Kawan] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan sama ada baraj baru di Mak Mandin Ampang Jajar, Sungai Perai negeri Pulau Pinang akan dibina yang mana juga turut berperanan membantu mengelak (*saline intrusion*) daripada memasuki muka sauk di sungai berkaitan. Jelaskan juga sama ada Kementerian mempunyai perancangan jangka masa panjang untuk membina Takungan Air Pinggiran Sungai (TAPS) dalam membekalkan sebuah takungan air mentah simpanan untuk kegunaan pada musim kemarau atau tempoh kecemasan.

24. PR-1523-L21966

Tuan Fathul Huzir bin Ayob [Gerik] minta **MENTERI PERTANIAN DAN KETERJAMINAN MAKANAN** menyatakan dengan melihat kepada keperluan asas rakyat Malaysia di mana Gerik mempunyai kawasan tanah yang luas. Gerik menawarkan pembangunan tanah bagi tujuan penanaman keperluan asas makanan negara seperti beras, ubi kayu, jagung dan lain-lain demi menyahut keperluan sumber makanan yang semakin meruncing di negara kita.

25. PR-1523-L21123

Dato' Sri Dr. Wee Jeck Seng [Tanjung Piai] minta **MENTERI PERTANIAN DAN KETERJAMINAN MAKANAN** menyatakan tindakan Kementerian bagi mengawal bekalan beras dalam negara untuk jangka masa pendek, sederhana dan panjang.

26. PR-1523-L22462

Tuan Afnan Hamimi bin Taib Azamuddin [Alor Setar] minta **MENTERI DALAM NEGERI** menyatakan jumlah terkini pelancong yang tidak keluar daripada Malaysia mengikut negara dan apakah usaha pihak Kementerian untuk mengesan serta memastikan mereka pulang ke negara asal mereka.

27. PR-1523-L22689

Datuk Jonathan Yasin [Ranau] minta **MENTERI PERTANIAN DAN KETERJAMINAN MAKANAN** menyatakan langkah-langkah yang akan atau telah dibuat oleh pihak Kementerian untuk memastikan bekalan beras tempatan mencukupi di pasaran.

28. PR-1523-L22394

Dato' Indera Dr. Suhaili bin Abdul Rahman [Labuan] minta **MENTERI EKONOMI** menyatakan secara terperinci pendekatan Kerajaan untuk jangka masa pendek, sederhana dan panjang bagi memastikan pengagihan pembangunan ekonomi yang lebih adil dan saksama antara negeri, wilayah dan sektor, sekali gus mengurangkan jurang pembangunan merentas wilayah.

29. PR-1523-L21641

Tuan Suhaizan bin Kaiat [Pulai] minta **MENTERI PERTANIAN DAN KETERJAMINAN MAKANAN** menyatakan apakah punca kekurangan beras tempatan dan langkah-langkah jangka pendek, sederhana dan panjang untuk mengatasinya.

30. PR-1523-L21904

Tuan Kalam bin Salan [Sabak Bernam] minta **MENTERI PERTANIAN DAN KETERJAMINAN MAKANAN** menyatakan tindakan segera Kementerian untuk menangani masalah kekurangan stok bekalan beras putih tempatan (BPT) yang sedang dihadapi di seluruh negara.

31. PR-1523-L21176

Datuk Seri Dr. Noraini Ahmad [Parit Sulong] minta **MENTERI PEMBANGUNAN KERAJAAN TEMPATAN** menyatakan sehingga kini berapa banyak projek perumahan Kerajaan yang berstatus "projek sakit" khususnya projek di kawasan Lembah Klang dan apakah bantuan dan solusi yang telah diberikan oleh Kementerian bagi membantu rakyat yang tersepit dengan masalah tersebut.

32. PR-1523-L22328

Dr. Ahmad Fakhruddin bin Fakhruddin [Kuala Kedah] minta **PERDANA MENTERI** menyatakan persediaan Kementerian memenuhi keperluan tenaga mahir untuk industri halal selari dengan hala tuju menerajui ekonomi Islam dalam Kajian Separuh Penggal RMKe-12.

33. PR-1523-L21527

Tuan Haji Aminolhuda bin Hassan [Sri Gading] minta **MENTERI EKONOMI** menyatakan jaminan Kerajaan dengan pelaksanaan gaji progresif tidak membebankan majikan terutamanya majikan dalam IKS.

34. PR-1523-L21742

Dato' Haji Abdul Khalib bin Abdullah [Rompin] minta **MENTERI PERTANIAN DAN KETERJAMINAN MAKANAN** menyatakan apakah Kerajaan mempunyai perancangan tertentu untuk mengawal kenaikan harga barangan khususnya beras keluaran tempatan di pasaran tempatan.

35. PR-1523-L22229
Datuk Seri Takiyuddin bin Hassan [Kota Bharu] minta **PERDANA MENTERI** menyatakan status siasatan kes dan pendakwaan terhadap skandal rasuah RM97 juta berkaitan pengambilan pekerja asing di Kementerian Sumber Manusia.
36. PR-1523-L22575
Datuk Dr. Nik Muhammad Zawawi bin Haji Salleh [Pasir Puteh] minta **PERDANA MENTERI** menyatakan perkembangan berkaitan reformasi institusi yang menjadi tawaran Pakatan Harapan sebelum ini dalam menjamin keadilan dan ketelusan demi mengelakkan penyalahgunaan kuasa termasuk SPRM diletakkan di bawah Parlimen.
37. PR-1523-L22257
Dato' Seri Hishammuddin bin Tun Hussein [Sembrong] minta **MENTERI PERTANIAN DAN KETERJAMINAN MAKANAN** menyatakan apakah kedudukan semasa bekalan beras tempatan di Malaysia berdasarkan tahap keupayaan Kerajaan menampung keperluan rakyat, kemampuan rakyat membeli beras dengan peningkatan harga beras dan perbandingan harga pasaran beras tempatan dan import di Malaysia dan negara-negara jiran.
38. PR-1523-L21682
Tuan Haji Muhammad Islahuddin bin Abas [Mersing] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan sekiranya larangan eksport nadir bumi (REE) diperkenalkan oleh kerajaan, apakah pelan jangka pendek dan jangka panjang Kerajaan untuk memanfaatkan sumber REE di negara kita dan bagaimana kerajaan dapat memastikan keuntungan diagih secara adil di antara Kerajaan Persekutuan dan Kerajaan Negeri hasil daripada jualan atau pemprosesan REE ini.
39. PR-1523-L21414
Puan Isnaraissah Munirah Majilis [Kota Belud] minta **MENTERI EKONOMI** menyatakan :
- (a) jumlah bayaran hasil petroleum ke Sabah yang telah digunakan bagi program pembasmian kemiskinan tegar dan perinciannya; dan
 - (b) adakah Kerajaan mengguna pakai kaedah penambahan pendapatan bulanan isi rumah berpendapatan di bawah garis kemiskinan bagi tujuan mencapai sasaran menoktahkan kemiskinan tegar tahun ini.

40. PR-1523-L22306

Tuan Nurul Amin bin Hamid [Padang Terap] minta **MENTERI PENDIDIKAN** menyatakan berkenaan perkembangan pindaan Akta Pendidikan 1996 (Pindaan) 2022 berkaitan dengan isu masalah keciciran pelajar.

41. PR-1523-L22419

Dato' Sri Dr. Haji Ismail bin Haji Abd. Muttalib [Maran] minta **MENTERI PERTANIAN DAN KETERJAMINAN MAKANAN** menyatakan :

- (a) berapakah jumlah subsidi minyak diesel kepada para nelayan dalam tahun 2020 hingga 2022; dan
- (b) berapakah jumlah perbelanjaan untuk subsidi tersebut dan berapa banyak pula anggaran ketirisan berlaku dan bagaimana usaha Kerajaan dalam mengawal dan mengatasi masalah ini.

42. PR-1523-L21729

Kapten Dato' Dr. Zulkafperi bin Hanapi (Bersara) [Tanjong Karang] minta **MENTERI PERTANIAN DAN KETERJAMINAN MAKANAN** menyatakan data pelan serta tindakan Kerajaan bagi menangani kos harga beras yang meningkat sejak akhir ini, sejauh manakah pelaksanaan pihak Kerajaan bagi mengimbangi harga beras tempatan dan import dalam isu tersebut.

43. PR-1523-L22623

Dato' Rosol bin Wahid [Hulu Terengganu] minta **MENTERI PERTANIAN DAN KETERJAMINAN MAKANAN** menyatakan sejauh mana penguasaan kartel dalam industri padi dan beras negara yang dikatakan menjadi punca hasil padi dan pendapatan pesawah tidak meningkat seiring dengan peningkatan teknologi.

44. PR-1523-L22248

Datuk Che Mohamad Zulkifly bin Jusoh [Besut] minta **MENTERI PERTANIAN DAN KETERJAMINAN MAKANAN** menyatakan kesediaan Kementerian untuk menambah kilang padi di daerah Besut bagi meningkatkan pengeluaran beras memandangkan wujud permintaan yang tinggi terhadap beras tempatan dalam pasaran.

45. PR-1523-L(5)00202

Dato' Mohd Isam bin Mohd Isa [Tampin] minta **PERDANA MENTERI** menyatakan persiapan Kerajaan dan agensi yang dipertanggungjawabkan untuk berdepan bencana banjir pada penghujung dan awal tahun serta jenis-jenis bantuan yang disediakan kepada mangsa banjir di seluruh negara.

[Pertanyaan di bawah PM 22(5)]

46. PR-1523-L(5)00206

Dato' Indera Mohd Shahar bin Abdullah [Paya Besar] minta **MENTERI EKONOMI** menyatakan apakah pelan mitigasi Kerajaan untuk mengatasi kenaikan mendadak harga minyak mentah global yang diunjurkan akan terus meningkat kepada AS\$100 setong bagi tahun 2024 memandangkan ianya sudah pasti akan memberi impak terhadap persekitaran ekonomi dan megakibatkan inflasi.

[Pertanyaan di bawah PM 22(5)]

47. PR-1523-L(5)00197

Tuan Cha Kee Chin [Rasah] minta **MENTERI PENDIDIKAN** menyatakan :

- (a) jumlah peruntukan penyelenggaraan tahunan yang telah disalurkan kepada sekolah Kerajaan mengikut aliran SJKC, SJKT, Sekolah Mubaligh dan SMJK (Conforming) untuk tahun 2018 sehingga 2023; dan
- (b) senaraikan nama SJKC, SJKT, Sekolah Mubaligh dan SMJK (Conforming) berstatus sekolah Kerajaan yang telah menerima peruntukan penyelenggaraan tahun 2023 dan nilai peruntukan masing-masing.

[Pertanyaan di bawah PM 22(5)]

48. PR-1523-L(5)00194

Tuan Cha Kee Chin [Rasah] minta **MENTERI DALAM NEGERI** menyatakan apakah pihak KDN atau Polis Diraja Malaysia (PDRM) mempunyai apa-apa rancangan pembangunan terhadap sebidang tanah di Lot 4917 G.M. No. 549/65 Bandar Seremban Daerah Seremban. Pada 1 November 2023, wakil agensi telah melakukan tinjauan dan dimaklumkan bahawa sebuah kuarters akan dibina di lot tanah ini yang dikelilingi oleh Kampung Baru Rasah. Apakah ini makluman ini benar atau sebaliknya.

[Pertanyaan di bawah PM 22(5)]

49. PR-1523-L(5)00203

Tuan Syahredzan bin Johan [Bangi] minta **MENTERI DALAM NEGERI** menyatakan :

- (a) jumlah permohonan Kad Perjalanan Perniagaan APEC yang diterima, dilulus, ditolak sejak tahun pelaksanaan sehingga kini, dan kad yang masih sah laku setakat ini; dan
- (b) jumlah pemohon berjaya yang belum mendapat kad fizikal dan permohonan yang tertunggak akibat kerosakan mesin cetak kad pada tahun ini.

[Pertanyaan di bawah PM 22(5)]

ATURAN URUSAN MESYUARAT DAN USUL-USUL

1. (D.R. 42/2023) Rang Undang-Undang Kawalan Produk Merokok Demi Kesihatan Awam 2023 - **Menyambung semula perbahasan atas masalah, "Bahawa Rang Undang-undang ini dibacakan kali yang kedua sekarang." (29 November 2023)**

[Menteri Kesihatan]

2. (D.R. 26/2023) Rang Undang-Undang Makanan (Pindaan) 2023. **Bacaan Kali Yang Kedua**

[Menteri Kesihatan]

3. **Menteri Ekonomi** akan mencadangkan :

“Bahawa Dewan ini memahami akan perlunya satu dasar untuk mereformasi pasaran kerja melalui Kertas Putih Cadangan Dasar Gaji Progresif agar golongan pekerja mendapat gaji yang lebih tinggi seiring dengan peningkatan produktiviti.

Bahawa Dewan ini mendukung aspirasi Kerajaan untuk menstruktur ekonomi ke arah Malaysia sebagai sebuah negara berpendapatan tinggi dengan memperkenalkan dasar gaji yang dijangka berupaya mengurangkan ketidaksamarataan pendapatan, meningkatkan produktiviti pekerja dan daya saing syarikat.

Bahawa Dewan ini menyokong usaha pelaksanaan Dasar Gaji Progresif yang akan dimulakan dengan projek rintis bagi menentukan keberkesanan dan ketersediaan sebelum pelaksanaan Dasar Gaji Progresif dibuat secara menyeluruh.

Bahawa Dewan ini menyeru semua pihak berkepentingan untuk bersama-sama memikul tanggungjawab dalam menjayakan usaha ini sejajar dengan pendekatan kolektif dengan semua pihak termasuk Kerajaan, majikan dan pekerja.

Bahawa Dewan ini meluluskan Kertas Putih Cadangan Dasar Gaji Progresif supaya menjadi hala tuju reformasi pasaran kerja negara seperti yang dinyatakan dalam Kertas Perintah CMD. 69 Tahun 2023 iaitu Kertas Putih Cadangan Dasar Gaji Progresif.”

4. **Menteri Kewangan** akan mencadangkan :

“Bahawa Dewan ini mengambil ketetapan iaitu menurut kuasa yang ditetapkan padanya oleh subseksyen 11(2), Akta Kastam 1967 supaya Perintah Duti Kastam yang dibentangkan di hadapan Majlis ini sebagai kertas statut bilangan ST.185, ST.186, ST.187, ST.188, ST.189, ST.190, ST.203, ST.204 dan ST.205 bagi tahun 2023 disahkan.”

5. **Menteri Kewangan** akan mencadangkan :

“Bahawa Dewan ini, mengikut peruntukan di bawah subseksyen 10(4)(a) Akta Tatacara Kewangan 1957 (Akta 61), membuat ketetapan bersetuju supaya Kumpulan Wang COVID-19 ditutup.”

6. **Menteri Kewangan** akan mencadangkan :

“Bahawa mengikut peruntukan perenggan 4(b) Akta Pendanaan Kerajaan 1983 [Akta 275], mengambil ketetapan supaya Kerajaan memindahkan sebanyak RM21,000 juta di bawah seksyen 3(1) Akta yang sama, iaitu baki wang terimaan Terbitan Pelaburan Kerajaan Malaysia (MGII) bagi tempoh Jun sehingga November tahun 2023 ke Kumpulan Wang Pembangunan.”

7. Pengerusi Jawatankuasa Pilihan Khas Kesihatan oleh Yang Berhormat Datuk Seri Dr. Dzulkefly bin Ahmad, Ahli Parlimen Kuala Selangor akan mencadangkan :

“**BAHAWA** Penyata yang disiapkan oleh Jawatankuasa Pilihan Khas Kesihatan untuk mengkaji Rang Undang-Undang Kawalan Produk Merokok Demi Kesihatan Awam 2023, yang dibentangkan dalam Majlis ini sebagai Kertas DR. 8 Tahun 2023 diperkenankan mengikut Peraturan Mesyuarat 60”.

8. PR-1523-U(27)278

Datuk Seri Ir. Dr. Wee Ka Siong [Ayer Hitam] akan mencadangkan :

“Bahawa Dewan Rakyat ini menggesa Kerajaan untuk segera menangani isu gangguan bekalan beras putih tempatan (BPT) di pasaran yang kian meruncing susulan tindakan India menghentikan eksport beras putihnya ke pasaran.

Langkah penetapan had pembelian maksimum 100kg BPT untuk setiap individu dan syarikat bermula 7 September 2023 hanyalah penyelesaian yang bersifat sementara dan Kerajaan seharusnya mula merangka satu pelan yang lebih tuntas dalam usaha menjamin keterjaminan bekalan beras di Malaysia bagi jangka masa yang panjang.

Kerajaan perlu segera mewujudkan rangka tindakan yang lebih komprehensif bagi mengurangkan impak inflasi makanan global dari terus menghimpit rakyat negara ini khususnya berkaitan beras yang menjadi makanan ruji kita semua.”

[Menteri Pertanian dan Keterjaminan Makanan]

9. PR-1523-U(27)279

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan mencari penyelesaian untuk mengurangkan kos pengambilan pekerja asing yang kian melambung tinggi. Kebergantungan majikan tempatan terhadap pekerja asing berbanding pekerja tempatan di negara ini bukanlah perkara asing terutama dalam sektor 3D (*dirty, dangerous and difficult*).

Maka, adalah penting untuk mewujudkan satu dasar yang lebih komprehensif bagi mengurangkan kebergantungan terhadap pekerja asing agar pekerja tempatan diberi keutamaan terlebih dahulu dengan reformasi terhadap ekosistem sektor 3D meliputi kadar gaji, faedah dan sebagainya yang berpadanan dengan risiko pekerjaan perlu diimplementasikan secara berseiringan."

[Menteri Dalam Negeri]

10. PR-1523-U(27)280

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk mewujudkan satu dasar mengutamakan sajian menu buah-buahan tempatan di semua majlis rasmi Kerajaan sebagai galakan dan sokongan kepada pemain industri buah-buahan tempatan serta ke arah membudayakan amalan pemakanan sihat.

Adalah menjadi tanggungjawab Kementerian bagi membantu pengusaha buah-buahan tempatan untuk memasarkan serta mempromosi hasil ladang mereka dan sekali gus meningkatkan pendapatan. Maka melalui sajian menu buah-buahan di kesemua majlis rasmi Kerajaan perlu dibudayakan sepenuhnya sebagai sokongan terhadap industri buah-buahan tempatan."

[Menteri Pertanian dan Keterjaminan Makanan]

11. PR-1523-U(27)281

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan perancangan jangka masa panjang yang menyeluruh dalam memastikan Jumlah Kadar Kesuburan (Total Fertility Rate) bagi rakyat Malaysia terus meningkat.

Negara kita telah beralih ke status negara menua pada tahun 2021. Hal ini kerana peratusan penduduk berusia 65 tahun dan ke atas telah mencapai 7% daripada jumlah populasi. Trend ini menunjukkan peningkatan dalam dua tahun lalu pada kadar 0.2 peratus setahun di mana pada tahun 2022 sebanyak 7.2% dan dijangka pada tahun 2023 mencapai 7.4%.

Dalam tempoh dua dekad lagi, negara dijangka beralih kepada negara tua apabila kohort umur yang sama mencapai 14% daripada jumlah populasi. Peralihan ini tentunya memberikan kesan yang paling ketara iaitu kepada penurunan trend populasi pekerja dan produktiviti. Bagi menghadapi cabaran dan dampak negara menua, kita perlu mencari jalan memperlahankan proses penuaan ini. Proses penuaan ini tidak boleh dihalang atau diberhentikan tetapi kita perlu mempunyai pelan persediaan bagi menghadapi situasi tersebut.

Jika kita teliti jumlah peratusan struktur umur penduduk yang berumur 0-14 tahun berlaku penurunan pada kadar 0.4% bagi 3 tahun iaitu ; tahun 2020 sebanyak 24%, 2021 sebanyak 23.6%, 2022 sebanyak 23.2%, dan 2023 sebanyak 22.6%.

Umum mengetahui negara-negara jiran dan serantau juga menghadapi perkara penurunan bagi jumlah kadar kesuburan, tetapi kadar tersebut agak perlahan penurunannya. Sehubungan itu, objektif kita agar dapat melandaikan graf penurunan ini bagi negara kita.

Persoalan saya, apakah kemampuan hospital Kerajaan dalam meningkatkan kemampuan kesihatan reproduktif. Berapa jumlah Hospital yang menyediakan perkhidmatan IUI dan IVF. Berapa ramai doktor pakar reproduktif masih berkhidmat di hospital Kerajaan. Adakah harga perkhidmatan yang dikenakan mampu diakses oleh rakyat. Berapa jumlah makmal reproduktif.

Dewan Rakyat juga perlu mencadangkan agar Kerajaan menetapkan polisi yang mampan seperti fleksibel waktu bekerja, yuran pusat penjagaan kanak yang mampu bayar, perbanyakkan pusat asuhan ditempat kerja, dan *paternity leave* kepada ibu bapa yang bekerja untuk meringankan bebanan mereka dalam meningkatkan kadar reproduktif rakyat Malaysia. *Population Complexity* ini yang harus kita uruskan dengan penuh keberanian dan semua pihak kena bersama-sama."

[Menteri Pembangunan Wanita, Keluarga dan Masyarakat]

12. PR-1523-U(27)283

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan sebuah Kertas Putih Imigresen yang membincangkan tentang kadar atau jumlah sebenar kemasukan pelawat asing ke negara Malaysia.

Perkara ini bertujuan untuk mengetahui pergerakan pelawat asing berkenaan sama ada mereka terus tinggal di Malaysia atau dalam satu tempoh tertentu. Menerusi ini kita akan mengetahui jumlah sebenar populasi rakyat di negara ini melalui pengenalanpastian perbezaan antara jumlah Warganegara Malaysia, Jumlah Pelawat Asing yang masuk ke negara kita sebagai pekerja ataupun dengan tujuan melancong.

Hal ini, akan memudahkan Kerajaan untuk merangka dan melaksanakan pelbagai pelan inisiatif mahupun bantuan seperti subsidi bersasar dan lain-lain agar setiap pelaksanaan tersebut dinikmati oleh rakyat di negara kita."

[Menteri Dalam Negeri]

13. PR-1523-U(27)286

Datuk Seri Panglima Madius Tangau [Tuaran] akan mencadangkan :

"Bahawa Dewan ini menerima hakikat bahawa lebih 100,000 calon peperiksaan SPM pada tahun 2022 telah gagal dalam mata pelajaran dan sekaligus gagal mendapat Sijil Pelajaran Malaysia (SPM).

Menerima hakikat juga bahawa kegagalan dalam peperiksaan SPM ini mengakibatkan masa depan yang gelap kepada calon pada purata 70 ribu hingga 100 ribu setahun.

Menerima hakikat bahawa pelajar tercicir ini tidak ada lagi ruang untuk melanjutkan pelajaran maka segolongan pelajar tercicir ini akan menjadi kerugian dalam sumber tenaga kerja negara.

Dan menerima hakikat bahawa matlamat mendidik sebuah generasi pelajar untuk membina dan membangun negara kita telah gagal maka Kerajaan hendaklah mengambil tindakan yang serius terhadap masalah ini.

Maka dengan itu Dewan Yang Mulia ini hendaklah membuat ketetapan agar silibus dan buku-buku teks Subjek Sejarah Tingkatan Satu, Dua, Tiga, Empat dan Tingkatan Lima hendaklah dikaji semula dan sebuah Jawatankuasa Pilihan Khas Parlimen hendaklah ditubuhkan untuk mendapat pandangan daripada setiap lapisan masyarakat daripada seluruh pelusuk negara, dan pada masa yang sama Jemaah Kabinet hendaklah menubuhkan sebuah Jawatankuasa Kabinet Kajian Semula Silibus dan Buku Teks Sejarah yang dianggotai oleh Menteri-Menteri yang mewakili Sabah, Sarawak, Persekutuan Tanah Melayu dan parti-parti politik yang menubuhkan Kerajaan Perpaduan."

[Menteri Pendidikan]

14. PR-1523-U(27)287

Datuk Seri Panglima Madius Tangau [Tuaran] akan mencadangkan :

"Bahawa Dewan ini Menerima hakikat bahawa sebuah Suruhanjaya Siasatan DiRaja yang ditubuhkan oleh Kerajaan suatu ketika dahulu telah berjaya membuat siasatan dan seterusnya telah dibentangkan di Dewan Yang Mulia ini.

Dan menerima hakikat bahawa setelah sekian lama laporan tersebut telah gagal dilaksanakan dan mengakibatkan ketidakpuasan hati sebahagian besar daripada rakyat Malaysia.

Menerima hakikat juga bahawa rakyat tertanya-tanya apakah yang telah terjadi dengan laporan Suruhanjaya Siasatan DiRaja tersebut.

Dan menerima hakikat bahawa kecelaruan urus tadbir Pendatang Tanpa Izin; Penduduk Asing di Sabah yang mempunyai Kad Pengenalan yang meragukan; Peningkatan Bilangan penduduk di Sabah Tanpa Kewarganegaraan ataupun *stateless children* dan kehadiran orang asing yang memegang dokumen IMM13 yang tidak ada halatuju.

Maka Dewan Yang Mulia ini hendaklah membuat ketetapan bahawa sebuah Jawatankuasa Pilihan Khas Parlimen untuk meneliti dan mengkaji semula rekomendasi dan perakuan Laporan Suruhanjaya Siasatan DiRaja Mengenai Pendatang Asing Tanpa Izin untuk merumuskan suatu Road Map penyelesaian tuntas terhadap masalah oleh empat kategori penduduk golongan pendatang asing di Sabah."

[Menteri Dalam Negeri]

15. PR-1523-U(27)290

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan meletakkan sebuah garis panduan untuk sekolah-sekolah bagi pengurusan dana, perbelanjaan, dan juga aktiviti kutipan wang daripada pelajar, ibu-bapa, dan orang ramai. Selain itu, sebuah badan pemantau perlu diwujudkan bagi memastikan garis panduan ini dipatuhi. Ini kerana, kini sudah menjadi sebuah kelaziman untuk pihak-pihak sekolah menganjurkan program-program dan majlis-majlis yang memakan belanja besar, yang menggunakan duit daripada poket pelajar. Sebahagian daripada majlis ini mewajibkan kehadiran, dan sebahagian lainnya adalah secara sukarela. Tetapi harus kita faham, kewujudan jurang ekonomi akan membuatkan wujudnya golongan pelajar yang rasa keciciran sosial disebabkan faktor kewangan keluarga. Ia juga membuat mereka berasa tertekan serta memberi tekanan kepada ibu-bapa, lebih-lebih lagi dalam situasi ekonomi kini. Bukan sahaja untuk majlis, malah sering juga pihak sekolah membuat kutipan wajib bagi pembaharuan infrastruktur, dan kutipan ini kadangkala boleh mencecah ratusan ringgit. Isu ini merupakan sebuah isu yang kurang mendapat perhatian tetapi penting untuk dibawa ke hadapan kerana ia melibatkan sosioekonomi keluarga B40 dan M40 serta kesejahteraan perkembangan minda dan emosi para pelajar yang bakal menjadi teraju negara ini di masa hadapan. Selain itu, dibimbangi jika tiada pemantauan dilakukan, perkara ini akan membuka ruang untuk pihak tertentu mengambil kesempatan."

[Menteri Pendidikan]

16. PR-1523-U(27)291

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan mengambil langkah pro-aktif dalam menangani serta menghentikan kes jenayah dera kanak-kanak di negara ini. Menteri Dalam Negeri pada 14 Mac 2023 melaporkan bahawa terdapat 220 kes kanak-kanak mati akibat penderaan antara tahun 2018 hingga 2022. Data Kementerian Pembangunan Wanita, Keluarga dan Masyarakat antara Januari hingga Jun 2022 juga mendedahkan terdapat 1,055 kes penderaan kanak-kanak di negara ini. Kanak-kanak adalah masa depan negara. Lantaran itu, pihak kerajaan wajar menangani lantas menghentikan kitaran dera ini dengan sebuah target 'Dera Sifar' menerusi langkah-langkah pro-aktif seperti mewajibkan kursus penjagaan anak, mewujudkan sistem pemantauan berkala, meneliti semula undang-undang serta garis panduan berkenaan penjagaan kanak-kanak, meningkatkan kesedaran masyarakat, dan lain-lain."

[Menteri Dalam Negeri]

17. PR-1523-U(27)292

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat menggesa Kerajaan mengambil tindakan yang lebih pro-aktif dan efisien bagi meningkatkan kesedaran, tindak balas, dan kerjasama masyarakat dalam menghadapi bencana alam. Kerajaan telah mengumumkan penubuhan Pusat Bencana Geologi Negara pada akhir tahun ini serta pembangunan Sistem Amaran Awal Tanah Runtuh (SAATR). Inisiatif ini akan dapat meningkatkan kecekapan tindak balas bencana agensi-agensi berkaitan. Bagaimana pula dengan tindak balas masyarakat.

Apa yang telah dan sedang Kerajaan usahakan bagi memastikan rakyat bukan sahaja peka tetapi takut dan patuh kepada arahan yang dikeluarkan oleh pihak berkuasa. Kerajaan perlu menguatkuasakan Akta Pertahanan Awam 1951, Akta 221 bawah seksyen 4 (C) di mana tindakan boleh diambil ke atas mereka yang tidak patuh kepada arahan pihak berkuasa contohnya arahan untuk berpindah dalam situasi banjir yang boleh membahayakan penduduk dan pada masa yang sama memberi risiko kepada penyelamat."

[Perdana Menteri]

18. PR-1523-U(27)293

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan menubuhkan badan siasatan bebas bagi mengenal pasti secara terperinci punca utama yang menyebabkan kekurangan bekalan makanan seperti beras tempatan, ayam dan telur ayam di pasaran serta merangka perancangan penyelesaian jangka pendek dan panjang yang komprehensif termasuk penguatkuasaan terhadap golongan kartel orang tengah serta menambahkan daya pengeluaran bekalan makanan. Rakyat baik dari kalangan pengguna mahupun pengusaha restoran kecil masih mengeluh dengan permasalahan ini yang menyebabkan kenaikan harga bekalan makanan. Kerajaan tidak seharusnya melepaskan tanggungjawab menjaga keterjaminan bekalan makanan kepada individu (sebagai *end user*) mahupun menyarankan penyelesaian jalan mudah seperti menambah import makanan tetapi mencari penyelesaian sepanjang rangkaian jaringan bekalan bahan makanan mentah."

[Menteri Pertanian dan Keterjaminan Makanan]

19. PR-1523-U(27)294

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mewujudkan pusat benih padi khusus di kawasan utara khususnya di Arau, Perlis bagi membekalkan benih-benih padi yang bermutu tinggi dan membolehkan penyelidikan yang agresif dibuat bagi menghasilkan benih padi baru di samping menyelesaikan masalah ketidakcukupan benih padi di pasaran. Pusat Benih Padi adalah penting untuk mengumpul benih padi yang lebih berdaya komersial, lebih berdaya tahan iklim (*climate resistant*) dan sesuai dengan cuaca di kawasan utara Semenanjung Malaysia. Pusat ini juga boleh berperanan menjalankan kajian di peringkat serantau dan melibatkan penyelidik daripada negara-negara jiran seperti Thailand, Indonesia dan Myanmar yang mempunyai tanaman baka padi yang berdaya komersial tinggi."

[Menteri Pertanian dan Keterjaminan Makanan]

20. PR-1523-U(27)295

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji semula peruntukan khas yang boleh diberikan kepada pekebun kecil, penternak dan nelayan yang terjejas akibat situasi iklim yang tidak menentu serta kenaikan harga barang. Kerosakan tanaman dan kematian ternakan seringkali mendatangkan kerugian besar hingga kepada jutaan ringgit setiap kali berlaku bencana alam. Dengan situasi semasa ekonomi negara yang tidak stabil juga secara tidak langsung akan memberi tekanan kepada kos sara hidup pekebun kecil, penternak dan nelayan yang kebanyakannya bergantung harap kepada sumber pendapatan tersebut sahaja. Maka pemberian peruntukan khas ini dapat menambah baik kehidupan mereka."

[Menteri Pertanian dan Keterjaminan Makanan]

21. PR-1523-U(27)296

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyegerakan pembinaan dan baik pulih tembok sempadan Malaysia-Thailand supaya merangkumi keseluruhan perbatasan dari Perlis hingga Kelantan dan menyediakan suatu pelan tindakan komprehensif merangkumi semua agensi Kerajaan bagi kawalan sempadan Malaysia-Thailand. Sempadan Malaysia-Thailand adalah sepanjang kira-kira 656km namun hanya 111 km sahaja yang berpagar. Sebahagian tembok sempadan antara Malaysia dan Thailand di sepanjang Laluan Keselamatan dan Pembangunan (KESBAN) dilihat sudah usang manakala peralatan kamera litar tertutup (CCTV) dan alat pengimbas perlu ditambah, dibaik pulih dan dinaik taraf dengan teknologi terkini seperti

penggunaan dron. Beberapa insiden pada masa lalu seperti kes tembakan ke atas pasukan keselamatan negara dan bermaharajalelanya sindiket pemerdagangan manusia seperti yang berlaku di insiden Wang Kelian serta penyeludupan barangan termasuk dadah dan senjata menunjukkan betapa kritikalnya keperluan untuk meningkatkan tahap keselamatan di perbatasan. Kerajaan Malaysia sebelum ini telah memberikan komitmen untuk membina tembok sempadan tersebut tetapi sehingga terkini masih tiada pelan pembangunan komprehensif dan terperinci yang diumumkan. Mohon pihak kerajaan memandang serius perkara ini dengan menyegerakan pembangunan tembok sempadan Malaysia-Thailand secara menyeluruh dan memastikan suatu pelan komprehensif merangkumi semua agensi Kerajaan bagi kawalan sempadan Malaysia-Thailand agar benar-benar berkesan menjamin keselamatan perbatasan negara."

[Perdana Menteri]

22. PR-1523-U(27)297

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya agihan peruntukan pembangunan dan pelaksanaan projek pembangunan di peringkat negeri diberikan mengikut keutamaan dan keperluan Kerajaan Negeri. Berdasarkan pelan RMK-12, enam negeri kurang membangun akan terus diberi keutamaan dengan agihan sekurang-kurangnya 50% daripada keseluruhan peruntukan Perbelanjaan Pembangunan Asas Persekutuan. Namun begitu, terdapat beberapa projek yang diluluskan oleh Kerajaan Persekutuan tidak mengambil kira cadangan dan hasrat Kerajaan Negeri khususnya di Perlis untuk mempelbagaikan fungsi sesuatu projek sedangkan Kerajaan Negeri mempunyai dasar serta hala tuju yang telah mengambil kira pelbagai keperluan dan kehendak semasa serta pada masa hadapan. Misalnya, Projek Lencongan Banjir Barat Timah Tasoh yang telah dilaksanakan pada tahun 2015, di mana dalam pembinaan terowong banjir terdapat skop pembinaan pada item pencahayaan di dalam terowong berjumlah RM300 ribu. Namun, skop berkenaan telah dikeluarkan atas alasan penjimatan. JPS Perlis selaku pelaksana projek telah membangkitkan perkara ini supaya dikekalkan atas faktor keselamatan dan memudahkan kerja pemantauan serta penyelenggaraan di dalam terowong di masa hadapan. Akan tetapi, ianya masih tetap dikeluarkan daripada skop asal projek."

[Menteri Ekonomi]

23. PR-1523-U(27)298

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Kerajaan tidak boleh hanya memperkenalkan inisiatif yang hanya sekadar '*rebranding*' daripada Kerajaan sebelum ini kerana perubahan yang besar perlu dilakukan bagi mendepani kenaikan kos pembinaan disebabkan kenaikan harga barang binaan. Dasar Perumahan Negara (2018-2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah dijadikan salah satu sasaran kajian semula Dasar Perumahan Negara dan memerlukan input dari pelbagai Agensi dan Kementerian serta pihak bukan Kerajaan dan bukan dari satu Kementerian sahaja. Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini juga akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40."

[Perdana Menteri]

24. PR-1523-U(27)299

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan melaksanakan segera projek-projek tebatan banjir di seluruh negara untuk memastikan projek ini dilaksanakan secara holistik dan dapat mencari jalan penyelesaian kepada isu banjir yang semakin meruncing akibat kesan perubahan iklim dan pembangunan yang tidak mesra alam. Antara projek yang perlu dilaksanakan segera adalah seperti Projek Pembangunan Sungai Bersepadu (PLSB) Sungai Golok (KESBAN) dan Sungai Kelantan. Dengan pembinaan projek tersebut, risiko banjir besar dapat dikurangkan. Di samping itu, projek tebatan banjir di Selangor khususnya di Shah Alam dan bandar Kuala Lumpur juga diharapkan dapat dilaksanakan dengan komprehensif agar dapat menangani masalah banjir kilat."

[Menteri Sumber Asli, Alam Sekitar dan Perubahan Iklim]

25. PR-1523-U(27)300

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan melaksanakan satu perancangan persediaan dan pengurusan risiko bagi menghadapi bencana alam dapat disemak semula akibat impak perubahan iklim yang sangat drastik sejak kebelakangan ini. Hal ini demikian kerana perancangan rapi penting bagi memastikan tahap kesiapsiagaan anggota terlibat berada di tahap yang tinggi. Di samping itu, Kerajaan juga perlu merencana satu langkah holistik bagi mendidik masyarakat agar bersiap siaga untuk menghadapi bencana alam kerana kesedaran terhadap isu ini di dalam kalangan masyarakat masih berada di tahap yang rendah berdasarkan peristiwa bencana alam yang lepas."

[Perdana Menteri]

26. PR-1523-U(27)301

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya membentuk satu pasukan petugas khas bagi memberi perhatian terhadap isu pencerobohan sempadan yang berlaku di Sabah dan Sarawak. Seperti di ketahui, Sabah dan Sarawak pula berkongsi sempadan darat sejauh 2,019.5km dengan Kalimantan, Indonesia. Daratan Negara Brunei Darussalam dibatasi sepenuhnya oleh Sarawak sepanjang 481.3km. Kebanyakan kawasan perbatasan Malaysia bersama negara-negara jirannya terletak di kawasan perbukitan yang diliputi hutan tebal dan kawasan perairan laut menyebabkan kawalan terhadap kawasan-kawasan ini sulit dilakukan. Oleh sebab itu, masalah pencerobohan, penyeludupan, pemerdagangan manusia dan perdagangan narkotik adalah antara isu yang saban tahun masih berlaku dan sukar ditumpaskan. Dengan siapnya Lebuhraya Sematan – Telok Melano juga baru-baru ini secara tidaklangsungnya meningkatkan risiko pencerobohan sempadan sama ada melalui darat dan laut terutamanya melalui Taman Negara Tanjong Datu. Oleh hal yang demikian, tindakan segera Kerajaan bagi mencari solusi terbaik kepada masalah kawalan sempadan ini adalah amat diharapkan."

[Menteri Dalam Negeri]

27. PR-1523-U(27)302

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya melaksanakan tindakan kawalan yang lebih ketat berkenaan jualan arak. Garis panduan yang khusus perlu dikaji dan diwujudkan oleh Kerajaan bagi mengawal penjualan arak yang meliputi waktu dan tempat jualan arak yang seragam dan boleh diguna pakai di seluruh negara bagi tujuan mengelakkan masalah sosial yang sering timbul seperti masalah rumah tangga dan kemalangan jalan raya. Oleh yang demikian, keseragaman tindakan daripada Kementerian Kewangan dan Pihak Berkuasa Tempatan (PBT) adalah amat diperlukan sekiranya ingin melaksanakan tindakan kawalan yang lebih ketat terhadap jualan arak kerana ketika ini ketidakseragaman tindakan antara dua entiti ini menjadi antara punca kawalan jualan arak tidak dapat dilaksanakan secara efektif dan efisien."

[Menteri Kewangan]

28. PR-1523-U(27)303

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan bersikap adil dalam mengamalkan kebebasan media di Malaysia. Kerajaan tidak seharusnya menjadikan Suruhanjaya Komunikasi Multimedia Malaysia (SKMM) sebagai alat politik untuk menyekat mana-mana isi kandungan media yang tidak '*pro*' Kerajaan atau tidak sependapat dengan Kerajaan. YAB Perdana Menteri yang memerintah Kerajaan pada masa ini telah berikrar dalam manifestonya untuk memastikan hak kebebasan bersuara dan melindungi kebebasan media. Namun, keadaan sebaliknya berlaku selepas beberapa bulan beliau membentuk Kerajaan. Lebih mendukacitakan, kebebasan media yang diwar-warkan Kerajaan hanyalah terhad kepada '*pro*' Kerajaan sahaja, manakala parti pembangkang secara halus dikenakan sekatan kepada akses media. Mana-mana media rasmi Kerajaan mahupun swasta tidak diberi kebenaran untuk menyiarkan berita mengenai parti pembangkang mahupun pihak yang menentang Kerajaan. Oleh demikian, Kerajaan digesa supaya berlaku adil dalam menyalurkan maklumat kepada rakyat. Tindakan ini adalah penting untuk memastikan hak kebebasan media tidak dicabul sewenang-wenangnya oleh pihak-pihak tertentu."

[Menteri Komunikasi dan Digital]

29. PR-1523-U(27)304

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyediakan perancangan, peruntukan dan prasarana kepada pelajar-pelajar universiti, kolej, STPM dan SPM bagi menghadapi kaedah pembelajaran alaf baru seperti pembelajaran dalam talian dan menggunakan media elektronik. Ini bagi membolehkan dan mendedahkan mereka ke alam teknologi siber dan e-pembelajaran yang semakin berkembang yang seterusnya memerlukan guru-guru yang terlatih dalam pendidikan alaf baru."

[Menteri Pendidikan]

30. PR-1523-U(27)305

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan mengkaji semula kawasan keluar dan masuk sempadan Malaysia-Thailand di Wang Kelian, Perlis. Sebelum ini, penduduk kedua-dua negara boleh menikmati kemudahan bergerak sehingga dua kilometer tanpa menggunakan pasport atau pas sempadan pada hari minggu. Kuatkuasa itu pernah dibuat bermula tahun 1993 hingga 2015. Akan tetapi, penarikan semula kemudahan kebebasan bergerak ini telah dibuat pada tahun 2015 kerana penemuan rangka manusia mangsa sindiket pemerdagangan manusia yang dipercayai etnik Rohingya. Susulan itu, Wang Kelian menjadi pekan mati hingga kini. Kerajaan Negeri Perlis cuba membangunkan semula kawasan pelancongan di Wang Kelian, namun ianya tidak semeriah dahulu. Justeru itu, Kerajaan diharapkan dapat mengkaji dan mempertimbangkan semula untuk memberi kemudahan bergerak di antara kedua-dua negara seperti sebelum ini. Dengan kemudahan tersebut, ianya akan dapat menjana semula perkembangan ekonomi khususnya buat penduduk tempatan yang sebelum ini amat rancak sebelum ditutup sepenuhnya pada tahun 2015. Semasa adanya '*Free Flow*' ini, Wang Kelian merupakan satu destinasi pelancongan yang amat meriah dan telah memberi ruang kepada peniaga-peniaga kecil di Perlis dan juga Selatan Thailand menambahkan pendapatan mereka."

[Menteri Dalam Negeri]

**RISALAT-RISALAT YANG DIBAWA KE DALAM MESYUARAT
(DEWAN RAKYAT)**

<u>TAHUN</u> <u>2023</u>	<u>RISALAT/DOKUMEN</u>	<u>TARIKH</u> <u>DIBENTANGKAN</u>
DR. 18	Penyata Jawatankuasa Pilihan Khas Wanita, Kanak-Kanak dan Pembangunan Masyarakat mengenai Saringan dan Vaksinasi <i>Human Papillomavirus</i> (HPV)	30 November 2023
DR. 19	Penyata Jawatankuasa Pilihan Khas Perdagangan Dalam Negeri, Keusahawanan, Kos Sara Hidup dan Pertanian mengenai Laporan Lawatan Kerja ke Jepun Jawatankuasa Pilihan Khas Perdagangan Dalam Negeri, Keusahawanan, Kos Sara Hidup dan Pertanian	30 November 2023
DR. 22	Penyata Jawatankuasa Pilihan Khas Keselamatan mengenai Pelaksanaan Program Latihan Khidmat Negara (PLKN 3.0)	30 November 2023
DR. 23	Penyata Jawatankuasa Pilihan Khas Infrastruktur, Pengangkutan dan Komunikasi mengenai Laporan Lawatan Kerja Jawatankuasa Pilihan Khas Infrastruktur, Pengangkutan dan Komunikasi ke Negara Jepun	30 November 2023
ST. 227	Laporan Tahunan dan Penyata Kewangan Lembaga Penilai, Pentaksir, Ejen Harta Tanah dan Pengurus Harta Bagi Tahun 2020	30 November 2023
ST. 228	Laporan Tahunan dan Penyata Kewangan Institut Penyelidikan Perhutanan Malaysia (FRIM) Bagi Tahun 2022	30 November 2023

****UCAPAN-UCAPAN**
(PERATURAN MESYUARAT 17)
(KAMAR KHAS)

Tarikh Ucapan	Ahli Yang Berucap	Tajuk Ucapan	Menteri Yang Bertanggungjawab
1. 30.11.2023 (Khamis)	1. YB Tuan Tan Hong Pin (Bakri)	1. Isu Gangguan Bekalan Air di Parlimen Bakri	1. YB Menteri Sumber Asli, Alam Sekitar dan Perubahan Iklim
2. 30.11.2023 (Khamis)	2. YB Tuan Tan Hong Pin (Bakri)	2. Banjir Kilat yang Kerap Berlaku di Parlimen Bakri	2. YB Menteri Sumber Asli, Alam Sekitar dan Perubahan Iklim
3. 30.11.2023 (Khamis)	3. YB Tuan Ahmad Tarmizi bin Sulaiman (Sik)	3. Akses Pendidikan Pelarian Palestin dan Lain-Lain di Malaysia	3. YB Menteri Pendidikan
4. 30.11.2023 (Khamis)	4. YB Tuan Ahmad Tarmizi bin Sulaiman (Sik)	4. Akses Pekerjaan Pelarian Palestin dan Lain-Lain di Malaysia	4. YB Menteri Sumber Manusia

**** Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17)**